

Tanki Leendert den movecion

ORANJESTAD (AAN)- Recientemente 7 miembro nobo a keda instala pa bay asistie 6 miembronan cu a keda disponible pa traha e aña venidero den directiva di Centro Juvenil Tanki leendert. E directiva nobo ta consisti di Sr. Tony Dijkhoff, presidente, Sr. Francisco Rose, segundo presidente, Sr. Freddy Dijkhoff, secretario, Sr. Errol Sjak-shie como segundo secretario, Sr.

Vito Oduber, tesoroero y Srta. Ruth Geerman como segundo tesoroero. Ademas e directiva tin como comisarionan Srtas. Edith Tromp y Elizabeth Remmey y Sres. Corwin Krozendijk, Michael Eckmeyer, Ilco Dijkhoff, Eric Dijkhoff y Raymond Hernandez.

Desde e momento cu e organizacion aki a worde reactiva aña pasa, varios plannan a

worde desplega. Entre esakinan ta e raspado di e locual a resta di e edificio bieu di Centro Juvenil y e tereno na unda cu esaki ta construi.

E sitio aki na Tanki Leendert ta conoci como "Barak". Mesora despues di e trasaso a cuminza cu reconstruccion di e parti di e edificio cu por worde uza ainda. E promer actividad publico grandi cu a worde organiza ta fiesta di San Juan dia

24 di Juni ultimo. Na e ocasion aki alrededor di 500 hende a presenta e actividad aki.

E actividad aki un biaha mas a demostra cu e pueblo di Tanki Leendert y vecindario tin mester di un centro na unda cu por topa otro. Hopi ta e recuendonan cu a worde rebiba di e "Barak" di antes.

Tambe a keda institui ultimamente cuatro comision cu den e aña venidero lo mester bay desplega diferente actividadnan. E comision aki ta: 1) Comision di Deporte; 2) Comision di Actividadnan; 3) Comision di Educacion y Informacion; 4) Comision di construccion.

E ultimo aki lo bay tene su mes ocupa cu e construccion di un cancha deportivo y edificio pa e bario. Na e momentonan aki tramitanan ta worde haci pa yega na un ampliamento di e cancha. Intencion ta pa e aña aki ainda cuminza y termina cu e cancha aki.

Despues di e fase aki lo sigui e fase di construccion di un edificio cu por ofrece diferente facilidatnan recreativo y educacional na e bario di Tanki leendert. Tambe pa e muchanan lo mester bin cu un speeltuon nobo. Hunto cu e proyecto aki tin tambe un parke natural.

Banda di tur e actividadnan aki por bisa cu Tanki leendert ta moviendo poco poco ariba diferente tereno. Sigur e ac-

tividadnan di R.C.T.L., pa locual ta trata futbol, cu awor aki tin tres team inscribi pa e diferente campeonatonan nacional, no por worde lubida.

Tambe futbol di sala ta "in" na Tanki Leendert gracias na e team Barak Boys cu ta participa den e campeonato di Fefusa. Ultimamente Tanki Leendert a debuta tambe cu un team di hersengymnastiek, Barak Brains, na un torneo local. Tur esakinan ta mustra claramente cu Tanki Leendert ta moviendo.

Intencion di e directiva ta pa bay wak te con leu e Centro Juvenil por worde converti den un Centro di encuentro pa henter bario, na unda cu henter e pueblo por participa, di chiquito te grandi. Asina lo bay hiba combersacionnan cu e directiva di R.C.T.L. y C.B.T.L. pa mira te con leu por yega na un solo organisacion den e bario.

Pronto directiva lo anuncia su plannan tanto ariba tereno di deporte, actividadnan y construccion. Lo bin cu actividadnan pa e bario aunke cu e centro mes no ta cla ainda.

Di awor aki caba directiva di Centro Juvenil Tanki Leendert ta pidi principalmente e pueblo di Tanki Leendert y vecindario pa contribui cu e realisacion di e meta aki. Sostene e actividadnan y den e construccion di e cancha y centro.